

Ex-Minister Plenipotenciario sra. Ella Tromp-Yarzagaray ta recorda Percy Irausquin

Durante di mi periodo como Minister Plenipotenciario na Hulanda, mi por a presencia di cerca e comienzo di carera di e diseñador Arubano Percy Irausquin. Pami como representante di Aruba na Hulanda tabata un privilegio pa a mira con Percy e desaroya su mes. Na Juni 2002 mi por a presencia e prome show di moda di Percy, despues cu el'a gana e 'Frans Molenaar Couture Prijs 2001'. Esaki tabata na cas di e diseñador Frans Molenaar.

E prestigioso 'Frans Molenaar Couture Prijs', ta encera un suma di 11 mil euro.

Hopi diseñador ta anhela di bin na remarca pa ricibi un nominacion di e conocido premio aki, cu ta duna mas renombre den halto moda. Despues di esaki Percy a presenta cu exito su coleccion di

moda 'Bachanal Chic' y mi persona tabata un di e invitadonan di Percy na e exitoso fashion show aki. Mi ta corda cu Percy a haya masha bon reaccion riba su coleccion. Na final di e fashion show tabata tin hopi interes bao di e personanan presente pa adquiri algun di e creacionnan diseña pa Percy, asina e corant Hulandes De Telegraaf a skirbi den un articulo e siguiente dia. Tambe e popular programa di television RTL Boulevard a cubri e fashion show, mustrandó diferente di e bistanan diseña pa Percy y a tene un entrevista cu e diseñador Arubano, kende despues a biaha pa Paris pa acumula mas experiencia ainda cerca e famoso diseñador Frances Hubert Barêt. Un aña despues na November 2003 mi a presencia e apertura oficial di 'Boutique Capricho' den

Runstraat na Amsterdam. Un di e propietarionan di e boutique aki tabata Percy Irausquin. E apertura di 'Capricho' a keda efectua pa e tan conocida Fiona Hering, reportera di moda pa e corant Hulandes De Telegraaf y tambe comentarista pa e programa RTL Boulevard. Durante di e apertura tabata tin hopi persona di e mundo di moda y revistanan di moda cu a haci mencion di e creacionnan fabulosos di Percy.

Mi por a nota tambe cu regularmente Percy tabata ricibi atencion den e conocido programa RTL Boulevard pa su actividadnan y esaki semper tabata un tremendo promocion y publicidad pa Aruba, pasobra e programa ta ser mira pa varios miyon persona. Su coleccion di moda semper a ricibi bon comentario den e mesun

programa. Tambe e corant De Telegraaf den un edicion di fin di siman cu ta hopi lesa, a skirbi un articulo di dos pagina ariba Percy Irausquin bao e titulo di "De Beauty King van Aruba" cu sigur a yuda promove e nomber di Aruba mas ainda na Hulanda. Percy a trece e renombrado revista 'Beau Monde' Aruba pa haci un reportahe grandi di su creacionnan nobo, cu modelonan renombra di Hulanda.

Percy semper a hiba e nomber di Aruba halto. E tabata un excelente embahador pa nos pais. Lamentablemente destino a haci cu den culminacion di un carera tan briyante y prometedor abruptamente un fin ta wordo poni, aunke su nomber como diseñador lo continua pa hopi aña y su label PRC lo keda. Hopi di nos no por imagina cuanto esfuerzo y talento ta ser

requeri pa por yega den top di moda na Hulanda unda diseñadornan Europeo ta domina mundo di haute couture. Y tambe e logro pa como yui di tera di un pais chiquito manera Aruba, ser admira como un diseñador di clase halto pa personanan famosomanera actriznan, modelonan y e 'jet-set' hulandes. Pa su talento, perseverancia y e creacionnan unico, Percy a keda escogí como 'Diseñador di aña 2008 di Hulanda'. Aruba a perde un bon yiu di tera, pero nos mester acepta voluntad di nos Creador.

Mi sincero condolencia na henter famia y tambe na pueblo di Aruba cu perdida di un gran yiu di tera. Cu Percy sosega den Reino di nos Creador.

Ella Tromp-Yarzagaray
Augustus 2008



E famoso diseñador Hulandes Frans Molenaar personalmente a bin felicita Percy cu apertura di su atelier/boutique na Amsterdam.



Un di Percy su famoso creacionnan.